

07/11/1998

Marimuthu dipilih Tokoh Pengguna 1997

KUALA LUMPUR, Jumaat - Setiausaha Agung Gabungan Persatuan Pengguna Malaysia (Fomca), N Marimuthu, dipilih sebagai Tokoh Pengguna 1997 sempena sambutan Hari Pengguna Sedunia peringkat Kebangsaan, hari ini.

Beliau yang juga Presiden Persatuan Pendidik dan Penyelidikan Untuk Pengguna (Era Konsumer), dipilih berdasarkan pembabitan aktifnya dalam persatuan dan pertubuhan bukan kerajaan (NGO) di peringkat negeri serta kebangsaan.

Marimuthu adalah tokoh kelapan menerima anugerah itu bersama hadiah wang tunai RM2,000 dan tropi.

Anugerah itu disampaikan Perdana Menteri, Datuk Seri Dr Mahathir Mohamad.

Anugerah Ibu Tunggal Cemerlang pula dimenangi Sabariah Bongsu, 56, dari Kampung Pinang Jawa, Kuching, Sarawak.

Sabariah yang menjadi ibu tunggal sejak 1978, berjaya membesarkan tujuh anaknya, termasuk yang berjaya melanjutkan pelajaran ke pusat pengajian tinggi.

Anugerah Hidup Selesa pula dimenangi Razali Awang yang bertugas di Jabatan Kerja Raya, Terengganu.

Beliau yang berasal dari Kampung Banggol, Kuala Terengganu dipilih berdasarkan kejayaan membesarkan 13 anak, memiliki tabungan, menyediakan pendidikan anak dan keselesaan tempat tinggal, walaupun pendapatannya hanya RM900 sebulan.

Majlis Hal Ehwal Pengguna Negeri Paling Aktif pula dimenangi Pulau Pinang, manakala Majlis Hal Ehwal Pengguna Daerah Paling Aktif dimenangi Majlis Hal Ehwal Pengguna Temerloh, Pahang.

Sekolah Menengah Kebangsaan Ibrahim Fikri, Kuala Terengganu pula memenangi Kelab Pengguna Sekolah Terbaik.

Sementara itu, Menteri Perdagangan Dalam Negeri dan Hal Ehwal Pengguna, Datuk Seri Megat Junid Megat Ayob, berkata usaha kerajaan memantau barangan pengguna berjaya membendung kenaikan harga barangan kesan daripada kegawatan ekonomi.

Menurutnya, harga 60 daripada 223 barangan keperluan yang dipantau pengedaran, harga dan mutu kini lebih rendah berbanding sebelum kegawatan ekonomi.

"Kejayaan ini adalah hasil kerjasama peniaga, pembekal dan pengilang yang mengamalkan budaya niaga yang sihat," katanya.

(END)